

Ehuhuo-Ozi Nke Ebuo Polu Deje nni Ndi Kọrẹnti Ndi Kọrẹnti, Nke Ebuo

¹ Mmẹ wu Polu de Ekwkwọ-ozini. M wu onye-ozini pu-ichẹn nke Kraịstị wu Jizọsị ghahani uche Osolobue. Mmẹ le Timoti nwene enyi gba de e. Ndi uka Osolobue ri ali Kọrẹnti ke enyi ri e dejenni Ehuhuo-ozini, uwe le ndi nsọ ile hun we ile gba ri Azuun Akaya*.

² Efo ma le udon hun gha eka Osolobue Nedi enyi le Di-nwenni-enyi wu Jizos' Kraịstị bia ya rini unu.

Polu E Ye Osolobue Ekele

³ Ojija-mma ya rini Osolobue hun wu Osolobue le Nedi Di-nwenni-enyi wu Jizos' Kraịstị. Nedi omiken k'o wu, Osolobue hun nkasi-obi ile gha eka a a bia.

⁴ Iya wu onye a kasi enyi obi ime nsongbu enyi ile, keni enyi saeka e gi nkasi-obi hun Osolobue ye enyi nwen a kasi ndi ozo ri ime nsongbu owule obi.

⁵ Make ni, ke enyi don a ta oken afunfun make ifiri Kraịstị, erira ke Osolobue donzikwo a kasi enyi obi oda-oda ghahani Kraịstị.

⁶ Omeni nsongbu ri a biani enyi, o hu a biani enyi keni we gi e kasi onu obi, keni unu gizikwo a nwe nzuopuha; omeni we ri a kasi enyi obi, we ri e gi e kasi unu obi ebe unu no e wetu obi ali e dingbu udi afunfun ohu hu enyi ri a ta. ⁷ Ya wu, olil'anya enyi nwon banyeni unu turukwem. Make ni, enyi a

* **Isi Nke Ohu:1** Akaya le Grisi e d'e me ihien ohu.

maringhọ nị ke unu don e son ęnyi a ta afunfun ke unu donzi e son ęnyi a narin nkasị-obi.

⁸ Umune m, ęnyi cho nị unu marin nị ęnyi ta oken afunfun ke ęnyi ri Azuun Eshia: we songbu ęnyi oda-oda, karide hun ęnyi le enwen ęnyi saeka din—nke wu nị ęnyi erozini nị ęnyi k'a hun isi. ⁹ Ezie, o te ri ęnyi ke si a maguo we ęnyi ikpe-onwun. Kanị, onwan me keni ęnyi gi Osolobue don ęnya, Osolobue hun e weli ndi nwunni—hun nke ęnyi e gi gi enwen ęnyi don ęnya.

¹⁰ Iya gbapuha ęnyi ime eje-onodi hu te k'e gbuni ęnyi. O k'a ri a gbapuha ęnyi. Iya ke ęnyi ri e lee ęnya n'o k'a gbafuhazi ęnyi— ¹¹ unu gha e son ndi ozo e gi ekpere e yeni ęnyi eka, keni ndi bu oda hun uzọ gi ufiri ęnyi a kpanmin Osolobue, make ihien ri mma o gi efoma meni ęnyi ghahani ekpere ndi bu oda me.

Ihien Haiu Polu Gizileni Jen Korinti

¹² Ihien ęnyi gi a nyan isi wu onwan: nị obi ęnyi ri a shiani ęnyi eri nị ęnyi gi obi ri ochan le ezioku Osolobue bi obibi ęnyi ime uwa, tumadu egbata ęnyi le unu; nị ęnyi egin amamihięn uwa bi, kanị eyemeka Osolobue. ¹³ Make ni, ęnyi ara deni unu ihien owule kari hun unu a gun, o nị unu ghota; kanị m ri e lee ęnya nị unu k'a ghotachanrin ęnyi, ¹⁴ ke unu don nwan ghota ęnyi ekerę. Eghęę, unu a ghotaguo nị unu k'a saeka gi ęnyi nyan isi Uhuohin Nna ęnyi wu Jizosi k'a bia—nọke ke ęnyi nwen k'a don saeka gizikwo unu nyan isi.

¹⁵ Make ni onwan we m ęnya haiu m te gi kwademe nị m k'a biaguzi d'a hun unu, keni o wuru nị unu ngozi mgbe ebuo. ¹⁶ M te cho nị m bia d'a

hun unu m jenkoni Masedonia le m kinkozini, mme le unu nodiguu, unu e yeni m aka m jenkoni Judia.

¹⁷ Ogen m gi tu iroroni, m ri eroshi-azuunni, eroshi-azuunni? Ra m'a tu iroro ke ndi uwa hun a si, "eghee, eghee" le "mba, mba" mgbe ohu?

¹⁸ Kaka! Ebe o me ezie ni Osolobue wu onyeezioku, oku enyi a gwa unu e metuni "eghee le mba" nke onye e ku ebuo. ¹⁹ Make ni Nwa Osolobue wu Jesu Kristi, hun mme le Sivanosi, hun w'a kpozị Saịlasi, le Timoti zi unu ozi e, ele onye a si "eghee," a si "Mba;" kama, ihien ri ime e ogen ile wu "eghee." ²⁰ Make ni, ime e ke nkwa Osolobue ile no e mezuchanrin, a wu "eghee." Ya hain enyi gi a si "Isee" ghahani iya wu Jesu Kristi, e gi e ye Osolobue ogho. ²¹ Osolobue le enwen e wu onye hun e me enyi le unu e turukenme ime Kraisti; iya tume enyi, ²² ye enyi ahima a ghahani iwe Mmon-nsọ a che ime obi enyi, gi e henrin mbiye ihien ile o k'e meni enyi.

²³ Kani, m ri a kpoku Osolobue n'o shiagbu m eri omeni ele ezioku ke m ri e ku ni ihien hain m gileni biazị Kọrẹnti wu ni a choni m ni m bia a jugboma m unu. ²⁴ Ari m e gi e e ku ni enyi nwe e ku ihien unu gi okukwe unu e me. Ele 'ya—ihien rin'a wu ni enyi le unu gba a run keni unu nwehen ighoghọ hun k'a biani unu make ni unu turu ohunma ime okukwe unu.

Isi Nke Ebuo

¹ Ya ke m gi kwademe obi m ni abiakozị m ijen k'e buheni unu ufu. ² Make ni, m me unu ihien ufu, onye k'a gbazi m nwan ume? Ele ndi hun m meguu ihien ufu? ³ M de ni onu ehuhuo- ozi hu m de, amamgbe m'a bia, unu nwen, hun

nke e me m ghoghọ, e me m ihien k'a fu ni m. Makeni, a maringho m onu ile ohunma-ohunma, ni, m ghoghoma, unu ile k'a ghoghoma. ⁴ Ekwane le obi ri a gbawani m ke m gi de ya wu ekukwo-ozu. E deni me n'o fu unu, kani m de e ni unu marin ni unu ri m obi oda-oda.

Gbaghari Ni Nwan Onye Ahun Me Njo

⁵ Omeni o nwon onye me ihien ufu, ele mme suo k'o me e, kani o nwogho k'o gi me ezioku ni unu ile k'o me e. M si ni "o nwegho k'o don me ezioku" makeni achoni m ni m benyeni oku. ⁶ Udi afunfunni ndi ka oda buche eka ye onye no enina e higu. ⁷ Gbaghari n'a nwan, unu a roko a obi, amangbe o sukurughafe oken, ndun okukwe a guu a. ⁸ Ya wu, dodo, o ri eka unu, ghosizi n'a n'o ri unu obi.

⁹ Lee ni ihien hain m gi de ya wu ehuhuo-ozu: m de e ni m gi e lele onu, gizi e marin ke onu k'e mecharin ihien ile m si unu me.

¹⁰ Onye owule unu gbaghari, a gbaghari m'a. Ihien m gbaghari—omeni o nwogho ihien m gbaghari—m gbaghari make ufiri unu id'anya Kraisti, ¹¹ keni enyi gi e gbondon Ekwensu, amangbe o tunarin enyi ihien ri mma—makeni enyi a maringho ero e.

Nwene i?

¹² Ogen m gi ru ali Trasi d'e zi ozoma Kraisti, m no hun ni Di-nwonna-enyi a kpopuguo uzọ m'e gi run'a orun ebegu. ¹³ Kani, obi eruni m ali, makeni ahunni m Taitosi wu nwene m ime Kraisti ebegu. Ya m no si we nodi ohunma, m no jenne Masedonia.

Imeri Ghahani Kraisti

14 Kanị ekele ya rịnị Osolobue—makeni, Osolobue hụ e yesonme enyi mmeri oge ile ghahani onye-mmere ahun wu Kraisti—rike ndi ri e sonhunme onye-mmere, e gi enyi e zisonme ozi Kraisti ebe owule enyi jen, noke ishin-oma ri e kungbamani. 15 Makeni, ebe Osolobue ri, ishin Kraisti ke enyi wu—ke ebe ndi ri e nwon nzuopuha ri ke ebe ndi lako iwi ri. 16 Ebe ndi ahun lako iwi ri, enyi ri e shin ishin hun e gbuni; ebe ndi we ri a zuopuha ri, enyi ri e shin ishin hun e ye ndun. Onye k'a sa nwan aka me ihien ndini? 17 Enyi anoni ke ndi bu oda hun e ghoroku Osolobue leke si ibu-afia ro; kama, rike ndi ri ime Kraisti, enyi e ku oku-Chuku rike ndi-ezioku le ndi Osolobue zi, rike ndi ri id'anya Osolobue e ku.

Isi Nke Eto

Ndi-orun Nkwerigbama Ohunni

1 Enyi a jamazide nwan enwen enyi mma ra? Enyi ride nwan ndi ahun a cho onye e deye we ehuhuo biani unu keni unu kweri nabanhan we ra? Enyi ride nwan ndi ahun a cho ni unu deye we ehuhuo we e gi nabanhan we ra? 2 Mba! Unu le enwen unu wu ehuhuo-ozu enyi, hun we deye ime obi enyi, hun ihian ile marin le hun ihian ile a gun. 3 Ihien we a hun ebe unu ri a ghosi ni unu wu ehuhuo-ozu Kraisti de, hun o gha aka enyi zihē. Ele hun we gi peni de, kanị hun we de ghahani Mmon-nsọ Osolobue—Osolobue hun ri ndun; ele hun we deye ibe omuma—rike Iwu mbu ahun, kanị hun we deye ime obi ihian.

⁴ Eriira ke obi ruhan ęnyi ali ebe Osolobue ri ghahani Kraisti. ⁵ Eleni ęnyi le enwen ęnyi nwe iken me ihien owule hun ęnyi e gi si ni o nwon ihien gha ęka ęnyi a bia. Osolobue ya e me ęnyi gi e nwon iken e me ihien owule ęnyi e me. ⁶ Osolobue ya me ęnyi gi saeka wuru ndi-orun hun ma run orun ime nkwerigbama ohunni. Nkwerigbama ohunni ele nke Iwu we de ede, kani nke ime-mmom. Makeni hun we de e gbu egbu, kani Mmom-nso e ye ndun.

Nkwerigbama Akan Le Nke Ohun

⁷ O me nwan ni ofufe mbu hu gi ogho bia, ofufe hun e gbuni, hun we kayesonme ihien rin'a elu omuma, nke wu ni ndi Izrel' asani ęka lee Mozizi ęnya ihun makeni ogho ri n'a ri e gbuke—ogho hun fapukoni— ⁸ ogho ofufe hunni we gha ęka Mmom-nso e fe akariko a nwan, kari a ohunma-ohunma?

⁹ Omeni ofufe hu hun we gha a ma ihian ikpe e nwongho ogho, ya wu ni ofufe hunni, hun we gi a kpo ihian onye ri ochan k'a ka a ogho e nwon, ka a ohunma-ohunma!

¹⁰ Ezioku ri n'a wu ni ihien hun te nwon ogho mbu enwonzi nwan ogho, kaka—makeni hun ka ogho e nwon e kpumegu a.

¹¹ O me nwan ni nkwerigbama mbu hu le ofufe rin'a, hun we buguu nwan che usuo, gi ogho bia, ya wuni nke ohunni hun k'a to jenin ejen ka a ogho e nwon ohunma-ohunma!

¹² Ebe o me nwan ni ęnyi nwon udi olile-ęyani, ęnyi e ku, ekushi iken. ¹³ ęnyi anoni ke Mozizi hun gi ękwa kpume ihun, amamgbe ndi Izrel' a hun ebe ogho ahun ri e gbukeni no fapuchanrin.

¹⁴ Ezie, we kpume nghota we oghen hu. D'e rukwo

nwan tanni, wẹ gha a gụn mọbụ e gọn ntịn ke wẹ rị a gụn Ehuhuo-nkwerigbama akan hu, ekwa hu huzikwo ebegu—makeni ime Kraisti sọ ke wẹ nọ e wepu ya wu ekwa. ¹⁵ Ezie, ezie, d'e rukwo nwan tanni, oge n'owule wẹ gi a gụn Iwu Mozizi, ekwa hu e kpumechanrin uche wẹ. ¹⁶ Kanj, ihian buruhe Di-nwonnienyi, o wepu a ekwa hu kpume uche e ¹⁷ "Di-nwonnienyi" ahun wẹ rị e ku oku e wu Mmon-nso: ebe owule Mmon Di-nwonnienyi rị, ebegu ke ihian nọ e weri enwen e. ¹⁸ Enyi ile, hun wẹ kpupugu ekwa hu ihun, rị nwan e legha ogho Di-nwonnienyi nọke onyinyon rị ime ughegbe; wẹ hu e nwonhuto enyi ni enyi hun uzọ rị ke ihien ahun enyi rị e legha, e nwe ogho hu, e nwe waye e. Ihienni gha eka Di-nwonnienyi, hun wu Mmon-nso, a bia.

Isi Nke Eto

Ndi-ozu Nke Ukpẹ

¹ Ya wu, ebe o me nwan ni Osolobue e meguoni enyi omiken ye enyi orunni, ndun ara gu enyi. ² Enyi a juguo ihien-ifenren ndi hu ihian e zueme, juzikwo ime-ero le itu-ntu ye ime oku Osolobue. Eghẹ! Kama, enyi hu e kucharin ezioku k'o nọ, e gi e e wepuha enwen enyi a ghoji ihian ile idenya Osolobue, keni ndi ile e ku ezioku hun uzọ e lele ke enyi nọ.

³ Omeni echen ke ozioma enyi rị e zi zueri, ndi rị a la iwi sọ k'o zuerini. ⁴ Nke wẹ wu ni mmon hun rị a ki uwanj e kenkingu uwe ndi kwerileni enya, amangbe w'e legha ukpe ozioma ogho Kraisti; Kraisti, hun o me ni onye hunn'a a hunguwo Osolobue. ⁵ Makeni ele ozi enwen enyi ke enyi rị e zi;

ęnyi rị e zi ozi nị Jizọs' wụ Kraịstị wụ Di-nwọnni-ęnyi, nị ęnyi lę enwęn ęnyi wụ idibo ụnụ makę ifiri Jizọsị. ⁶ Makęni Osolobue ohu hụ hụn sị, “Ukpę ya nwunmę ebe ishi rị” ya nwun nwan ime obi ęnyi hụn ęnyi gi nwę ikęn legha ogho Osolobue ihun Kraịstị.

Ihięn Rị Mkpa W'e Buche Imę Ihięn E Tikponi

⁷ Kanị Osolobue buche orun oziomanị rị okęn mkpa ime ęnyi—ęnyi hụn wụ ite-ayogbe hụn e tikponi, kęni o we ęnya nị ikęnni pụ-ichęn ęnyi gi a rụn a wụ nke Osolobue—n'ọ ghanị ęka ęnyi bia. ⁸ W'e songbu ęnyi uzọ ile, kanị asanị wę ęka biangbu ęnyi; ihięn ndi hụn a gba ęnyi nghari-ęnya hụ a, kanị ndun ara guu ęnyi; ⁹ wę e kpokposonmę ęnyi, kanị Osolobue a junị ęnyi to; w'a kutu ęnyi, kanị ęnyi ara nwun. ¹⁰ Ihięn ęhụ ęnyi a hụn ogeę ile e mę ihian a hụn onwun Jesu nwun, kęni, ihian gha a hụn nị ęnyi hukwo ndun, e gi w'ę marin nị Jesu rị ndun. ¹¹ Makęni, hunnị ęnyi rị ndun, ihięn onwun gi a kpo ęnyi ihun a bia nị ęnyi ogeę ile makę ufiri Jizọsị, kęni ihian gi ęhụ ęnyini hụn a nwunhunnị a hụn nị Jizọsị rị ndun. ¹² Ya wụ nị onwun rị orun ęhụ ęnyi, kanị, ndun k'ọ rị a runfuha ime unu.

¹³ Kanị ebe o mę ni ęnyi nwon agungun okukwe ohu ahun wę ku oku ę ime Ẽkukwo-nsọ, sị, “M kweri ekweri, ya hain m gi ku ihięn m ku,” ęnyi nwen kwerezikwo ekweri, ya hain ęnyi gi rị e ku oku-Chuku ęnyi rị e ku. ¹⁴ Makęni, ęnyi a maringho nị Osolobue hụn gha onwun weli Nna ęnyi wụ Jesu jenkọ d'e welizikwo ęnyi k'ọ don weli Jesu, webanhan ęnyi lę unu ebe 'ya lę enwęn ę rị.

¹⁵ Ezie-ezie, ihienni ile wu n'ọ rini unu mma, keni ndi efoma Osolobue ri e ru eka hun uzọ e buwaye ọda, ekele ri a biani Osolobue a bawaye ọba.

Igi Okukwe E Bi

¹⁶ Ya wu, ndun aguko enyi. Oson'a ni ehụ enyi ri a kpo nkun, enyi hu e nwonwaye ndun ohun ime-mmoh uhuohin-uhuohin. ¹⁷ Makeni, ekere afunfunni enyi ri a ta ogeni, hun ghaleni e bie, ri nwan a kwademe enyi a toni ogho itebite hun we ghaleni a saeka e ku ke o han. ¹⁸ Eghee, makeni enyi ari e lee ihi enya e legha, kani ihi enya ghaleni e legha; makeni ihi enya e legha k'a ghari, kani ihi enya ghaleni e legha k'a to jenin ejen.

Isi Nke Isen

¹ Makeni enyi a maringho ni omeni e tikpo we ehụ enyini, oduni enyi bi ime e ime uwan, enyi e nwongho ulo hun Osolobue tun, hun we gileni eka tun, hun ri elu-igwee, ulo hun k'a to jenin ejen. ² Ime oduni enyi ri kikenni, enyi hu a sun-uden, o hu a gun enyi oda-oda ni we yime enyi ehụ enyi hu— ulo enyi hu, hun ri elu-igwee— ³ hun o me nwan ni enyi yiriguu a, enyi e meko ndi gba oto. ⁴ Makeni, hunni enyi rikwo ime oduni, ime ehuni, enyi hu a sun uden makeni ibu ri a nyin enyi. Eleni enyi cho ni enyi gba oto, kani, enyi cho ni we yimezi enyi hun-ebọ ahun, keni ndun luefu hun a nwunni—weri onodi a. ⁵ Onye hun kwademe enyi toni onwonhutoni wu Osolobue. O yeguọ enyi Mmon-nsọ nọke mbiye, gi ghoji n'o k'e me e.

⁶ Ya wu, obi e ru enyi ali ogen ile, oson'a ni enyi a maringho ni omeni enyi ri ime uloni wu ehụ enyi,

enyi ari ebe Di-nwonna-enyi ri, ⁷ makeni ihien enyi kweri banyeni Kraisti ke enyi gi e bi obibi, ele ihien enya enyi ri e legha. ⁸ Eghẹ, obi e ru enyi ali, nke wu ni o kade enyi mma ni enyi gha ime ehuni pu, laburu Di-nwonna-enyi d'a nodi ulo enyi hun ri ebe o ri. ⁹ Ifiri e, enyi a liliima ni enyi e me ihien a suo a usuo efo ogen ile—ke enyi ri ndun ime ehuni wu ulo enyi ke enyi ari. ¹⁰ Makeni enyi ile k'a puha ihun Oche-okink'ikpe Kraisti n'o kin enyi ikpe, keni onye-onye hun uzọ narin ugwo-orun ihien o run k'o ri ime ehuni—ke mma ke njo.

Orun Iwekinhen Ihian Ebe Osolobue Ri

¹¹ Makeni enyi a tu egun Di-nwonna-enyi, ya hain enyi gi a liliima ni enyi me ndi ozọ kweri; kanị Osolobue a maringho enyi le enwen enyi ohunma-ohunma; e gigho m'a don ni unu nwen a maringhozikwo enyi ime obi onu.

¹² Ekekwo ni enyi rizi a gwa onu ni enyi a rika mma! Mba. Enyi ri e ye onu ihien k'e me onu gi enyi nyan isi, keni unu saeka za ndi gi ihien enya e legha a nyan isi hun nke we gi gi ihien ri ihian obi nyan isi.

¹³ Makeni, omeni enyi e me ke ndi uche we zulenị, ifiri Osolobue ro; omeni enyi e me ke ndi uche we zu, ifiri unu ro. ¹⁴ Ihien-osusu Kraisti nwe jenni ihian ya ri e nu enyi, makeni o weguo enyi enya ni, ebe o me ni onye ohu a nwunguoni ihian ile onwun, ya wu ni ihian ile a nwunguo. ¹⁵ O nwunni ihian ile onwun, amamgbe ndi ri ndun gha e bizini enwen we, kama, ni we e bini onye hu gi ifiri we nwunhun, Osolobue e gi ifiri we weli e.

16 Ẹnyi arizi nwan e gi ẹnya-ihian e lee ihian. O sọn'a ni ẹnyi te gi ẹnya-ihian e lee Kraisti mbu, ẹnyi ara gizi e e lee e. 17 Ya wu, onye owule ri ime Kraisti a wuruole onye we kedonzi; ihien akan a gharigu, lee e, ihien ile e henringu nke ohun!

18 Ihienni ile gha eka Osolobue bia, onye hun donzi egbata ẹnyi le iya, wekinhen ẹnyi ebe o ri ghahani Kraisti; o no nwan ye ẹnyi orun iwekinhen ndi ozo ebe o ri. 19 Ya wu ni Osolobue ri ime Kraisti, e donzi egbata ya le ndi uwa; ara gizi njo we son we. O wegwo nwan ozi ya wu idonzi-egbata che ẹnyi eka zisonme. 20 Ya wu ni ndi-ozu Kraisti ke ẹnyi wu, Osolobue gi ẹnyi e ku onu a; ẹnyi gi nwan efan Kraist' e ku: dodo, o ri eka unu, "Kinhen ni d'e kunrun Osolobue!" 21 Osolobue gi ifiri ẹnyi gi Kraisti hun meleni njo owule henrin onye me njo, keni ẹnyi hun uzọ henrin ndi ri ochan.

Isi Nke Isin

1 Nọke ndi we le Osolobue gba a run, ẹnyi ri nwan a gwa unu oku: dodo, o ri eka unu, anile ni efoma Osolobue hun unu nabanhanguu la iwi. 2 Make ni Osolobue si,

“Hun o gihu ru ogen furu ni,
m no nu olu unu;
o ru uhuhin nzuopuha,
m no yeni unu eka.”

Lee n'e, kikenni wu ogen hu furuni! Tanni wu uhuhin nzuopuha!

3 Ẹnyi ari e me onye owule uke, amamgbe ihian a hun ihien w'e gi koriani orun ẹnyi ri a run ni Osolobue. 4 Mba. Kama, ime ihien ile, ẹnyi a

ghoṣichanrịn nị ẹnị wụ ndị-ọrụn Osolobue: gha-hani idin oken ndidi—ime nsongbu, ime afunfun le ebe o no ri ke si ihien ile e wiwichanringuo nị ẹnị; ⁵ we hu e gbu ẹnị ili, e gbu ẹnị mkpinsin; w'e bu ẹnị e che ime ulo-ngan, w'a kpu ẹnị e gbu; ẹnị a run oken-ọrụn, e chu-uran, e bu egun. ⁶ Ozozị, ẹnị hu e donme obi ẹnị ochan, e nwe amamihien, e nwe ndidi, a ri nsọ ime-mmọn, e nwe efoma, e nwe ihien-osusuo ibe ẹnị hun gha akpakali-obi fuha. ⁷ Ozozị, ẹnị e ku ezioku, ẹnị a ghoṣi iken Osolobue, ihien-ogun Osolobue cho suo ke ẹnị gi a lu, iya suo ri ẹnị eka-nni, ri ẹnị eka-ekpen. ⁸ We hu a gbaye ẹnị, e legberizikwo ẹnị; w'e ku oku ẹnị ohunma, e kujazikwo oku ẹnị; w'e me ẹnị ke si ẹnị ele ihien ẹnị si nị iya ke ẹnị wu; kani iya ke ẹnị wu. ⁹ Ẹnyi no ke ndi we marinleni, kani a maringuo we ẹnị; ẹnị no ke ndi ri a nwunni, ka lee ne nwan, ẹnị hu ndun! W'e ye ẹnị afunfun, kani ẹnị anwunni. ¹⁰ Ihien ekwan e mesonme ẹnị, kani, ẹnị a ghoḡho ogen ile; ẹnị no ke ndi igbenye, kani ẹnị e me ndi bu oda a wuru idafin; ẹnị no ke ndi nwonleni ihien owule, kani ihien ile wu nke ẹnị.

¹¹ Ẹnyi a shiapuguo nị onu ndi Kọrẹnti efo! Unu a hunchanringuo k'ọ ri ẹnị obi. ¹² Ẹnyi ari e zuemeni unu efo—kani unu e zueme nke unu. ¹³ M ri nwan a rio unu noke umu m: me ni ni m ke m don meni unu: shiapuchanrịn nị nwan efo.

Donme Ni Ulo-nsọ Osolobue Nso

¹⁴ Anile ni we kpagbama unu le ndi kwerileni ntutu ohu. Elee mmeko ke ezi-omume le eje-obibi nweḡe? Elee mmeko ke ukpe le ishi nweḡe? ¹⁵ Elee ogen ke Kraisti le Ekwensu gide kwerigbama?

Kini ridi ęgbata onye kwerini le onye kwerileni?
 16 Elee oęen ke lo-nsọ Osolobue le mmon gide
 nweme mmeko?

Enyi wu lo-nsọ Osolobue, Chuku hu ri ndun—
 noke ke Osolobue don ku e, si,

“M k'e biri ime ndun we,
 e jehunme ime igunrun we.

M k'a wuru Chuku we,
 a wuru we ndi nke m.’ ”

17 “Di-nwonnini-enyi si,
 gha ni nwan ime igunrun we puha,
 unu a nodi azuun ichen;
 emetukwole ni ihien owule ru unyin aka:
 oęen ahun ke m'e gi nabanhan unu;

18 a wuru m nedi onu,
 onu a wuru umu-m-ikennyel le umu-m-ikpoho,
 Iya ke Di-nwonnini-enyi Hun-nwon-iken-ile ku.”

Isi Nke sa

1 Ndi ri m obi, ebe o me nwan n'o kwesonmeguo
 enyi nkwa ndini we, ni enyi chanchan nwan enwen
 enyi, chanpu ihien owule hun e meru ehul le ime-
 mmon, e gi egun Osolobue a hun a ni enyi richanrin
 nsọ.

Nke We Ke Polu Ri E Ro

2 Nabanhan ni enyi ime obi onu; o nwonnini onye
 enyi me eje-ihien; o nwonnini onye enyi wiwi; o
 nwonnini onye enyi tunarin ihien e. 3 Ari m e ku onwan
 ni m gi ma unu ikpe, makeni e kuole m'a mbu ni
 unu ri enyi obi—nke wu ni enyi k'a saeka son unu
 nwun, enyi k'a sazikwo aka son unu ri ndun. 4 M'e
 gi unu a nyan isi oda-oda; m'e gi unu a dukemeka

obi; ọnu a gba m ume ọda-ọda; ime nsongbu ẹnyi ile, m'e gi ifiri ọnu e nwe ighoghọ ọda-ọda.

⁵ Makeṅi, ke ogeṅ ẹnyi gi rude Masedonia, ehu ẹnyi e ezuni iken kaka; we kpokpo ẹnyi azuun ile—oku-le-uka fihunme ẹnyi, egun hu a tu ẹnyi ime obi ẹnyi. ⁶ Kanṅi Osolobue, hun a kasi ndi ndun guchanrin obi no gi obibia Taistos kasi ẹnyi obi. ⁷ Elede obibia a so kasi ẹnyi obi, kanṅi, nkasi—obi hun ya le enwen e nwe make ihien o hun ebe unu ri, kasizi ẹnyi obi. Makeṅi, o gwaghọ ẹnyi ke m don ri a da unu! Ke eje-ihien hu meni don wute unu! Ke m rihan unu obi! Ya ke m no ghogokenme.

⁸ Ifiri e, osuon'a ni ihien m de ime ehuhuo—ozi ahun a fughọ unu, akwanzini m mmani—(kanṅi e te kwaghọ m, makeṅi m hun a ni e gigo m ya wu ehuhuo m de me unu ihien ufu—osuon'a ekere ogeṅ so ro.) ⁹ M ri nwan a ghoghọ. Ari m a ghoghọ n'o fughọ unu, kanṅi, n'o fughọ unu hun unu gi roghari—ya wu ni unu a nigho a fu unu udi hun Osolobue cho. Ya wu ni ẹnyi a runi unu ehu owule, kaka. ¹⁰ Makeṅi ihien futu ihian ke Osolobue don cho, o me ihian gbhuto obi, bihuto eka, o wehe nzuopuha. Mmani ara ri a! Kanṅi ihien futu ihian ke o don a fu ndi uwa, o buhe onwun. ¹¹ Unu ahunni nwan ke ime ihien ri mma ri a du unu makeṅi ihienni fu unu ke Osolobue don cho?! Unu ahunni nwan k'o rihan unu mkpa ighosi ni ẹnya unu eruni ihien meni! Lee k'o ri e zehan unu ize! Lee k'o tghan unu ẹnya! Lee ke m ri a dahan unu! Lee oken adudu o buhe! Lee afunfun unu ye onye hun mefieni! Unu a ghosichanringuo ni eka unu a ri ihien meni.

¹² Ya wu, osuon'a ni m de ni unu ehuhuo hu, ele ifiri onye me eje-ihien mobu onye we meja ke m

gi de ẹ. Kama, m de ẹ n'o we unu ẹnya id'ẹnya Osolobue ni ẹnyi ri unu obi nke-esi. ¹³ Onwan a kasiguọ ẹnyi obi.

Elede obi suo k'o kasi ẹnyi; kama, ighoghọ Taitosi mede ẹnyi ghoghokemẹ, make ni, unu ile e meguo nwan obi ru ẹ ali! ¹⁴ Eghẹ, unu anini ifenren isi m gi unu nyan ebe o ri me m. Isi ẹnyi nyan ebe Taitosi ri e me nwan ezioku noke ke ihien ile ẹnyi gwa unu mbu don wuru ezioku. ¹⁵ Ifiri e, ihien unu ri nwan a suokenme e—o gha a nyanhan ke unu ile don hume isi, a nyanhanzi egun le ehụ-omuma-nni unu gi nabanhan a. ¹⁶ M ri nwan a ghoghọ—make ni m gichanrin unu don ẹnya.

Isi Nke Esato

Kẹ Ndi Uka Dọn E Ye

¹ Umune, ẹnyi cho nwan ni unu marin efoma Osolobue me ni uka risonme Azuun Masedonia: ² osuon'a ni we ri ime oken nsongbu, cheni igbennye-mgbeleke we wu, oken ighoghọ we nwe ime Di-nwonn-ẹnyi anini onodi we gbondon we, we no ye, ye oda-oda! ³ Mme ri a shiani we eri ni we wefuha obi ye ke we nwonhan, yekaride ke we nwonhan! ⁴ We riokenme ẹnyi, ẹnyi dodo me ohunma bu we cheni ndi ri a tu ihieni we ri a tunni ndi nke Osolobue; ⁵ kani, we yekaride ke ẹnyi tu ẹnya a: e bugu we uzo we enwen we ye Di-nwonn-ẹnyi, ya we no nwan gi ifiri uche Osolobue we enwen we ye ẹnyi.

⁶ Ya hain nwan ẹnyi gi si Taitosi, hun bidon orun-eyemekani, ya d'e yeni nwan onu eka runfu a. ⁷ Ya

wu, ke unu don nwan e me ohunma ime ihien ile— ke okukwe ke iku-oku ke imarin-ihien ke adudu ri mma ke ihien-osusuọ hun ri egbata enyi le unu, erira ke enyi chozi ni unu me ohunma ebe orun-eyemekani ri.

⁸ Ele ni m ri e ye iwu, kama, m choko ni m ghosi unu adudu ndi ozo nwon, gi e chopuha ke ihien-osusuọ unu nwe wu ezigbo e. ⁹ Makeni, unu a maringho ke Onye-nwonna-enyi wu Jesu Kristi mehan efoma: ni, k'o mele odafin ru, o gi ufiri unu henrin ogbenye keni unu gha ogbenye o dan wuru idafin.

¹⁰ Ndunmodun m ime ihienni wu onwan: o furu ni unu runchanrin nwan orun-eyemekani unu bidon akan-ahun. Unu bu uzọ runma a; elede ohun suọ, unu k'o bude uzọ duma ni unu me e. ¹¹ O ruguọ ni: runchanrin n'a nwan; gi ni nwan ihien unu nwon runchanrin a k'o don du unu ni unu run a isi-ibuzo hu. ¹² Makeni, omeni ihian wepuha obi e ile ye ihien, ihien o nwe ke we e lee enya a narin a ya, ele ihien o nwonleni.

¹³ Ele ni m cho n'o ri ni ndi ozo nfe, o wuru ni unu ibu. Kama, n'o wuru ahanmahan: ¹⁴ hunni unu nwon nwan oda bu mkpa gi we nwen, nke unu a ban ni we; o ruzi, oda we nwon e wehe ni onu ihien ri onu mkpa—o wuru ahanmahan. ¹⁵ Erira ke we de e ime Ehuho-nsọ, ni

“Nke onye hun kponrin oda ehikeni;
nke onye hun kponrin ekere
emekeni ekere.”

Taitosi Le Ndi Hun Ya le We Wi

16 Ekele ya rịnị Osolobue hụn bu adudu ohu hụ m nwe make orinimma onu che obi Taiotosi. 17 Elede n'o kweri aririo enyi rio a suo, kanị, ebe o me ni kikenni k'o k'a du, o k'e gi uche e bia d'a hun unu. 18 Enyi zila 'ya le nwee-enyi hu ndi ile kwerini marin ohunma-ohunma makeni o zisonme ozioma. 19 Elede ni ndi ile kwerini marin nwee enyi hu suo, kanị uka ile kwerigbamade, tume e n'o son enyi, enyi gha e jensonme a run orun-eyemekani enyi gi e ye Di-nwonni-enyi le enwen e ogho, a ghosizi ni enyi cho n'o rini umune enyi mma.

20 Enyi bu obi ni ihian ahunko ihien w'e gi koriani enyi make oyiyeni hi-ogbe enyi ri a na, 21 makeni, o rika enyi mkpa ni enyi run a hun ri mma, ele enya Di-nwonni-enyi suo, kanị enya ndi ozozu.

22 Enyi zilazi nwee enyi ozozu cheni we, nwee enyi hun enyi lelegu mgbe ole-le-ole hun a ni o nwongho adudu ihien bu oda—kikenni k'o kazi adudu hu e nwon kari mbu, makeni obi rukeme e ali ebe unu ri.

23 O me nke Taiotosi, onye mme le iya a wi le onye mme le 'ya gba a run orun enyi gi e yeni unu aka ro; nke umune enyi ndi ozozu hu 'ya le uwe wi, we wu ndi-ozu pu-ichen ri a nokin enya uka ichen-ichen, e weheni Kraisti ogho. 24 Ya wu, gi ni nwan oghereni ghosi ndini we ni unu nwe ihien-osusuo we, keni ndi uka ile hun uzozu gi e don, a hun we ihien enyi gi e gi unu a nyan isi.

Isi Nke Itenei

Ihien We Tunu Ndi Uka Ri Jerusalem

¹ O rịkani mkpa ni m de ni unu ihien owule banyeni ihien we ri a tuni ndi kwerini ri Jerusalem. ² Makeni, a maringho m ni ihienni hu a du unu. Adudu unu hain m gi gi unu nyan isi ebe ndi Masedonia ri, si we ni ndi ri Akaya a kwademeole kete akan-ahun; adudu onu a kpasuguo ndi bu oda ime we. ³ Kani m zila ni unu umune-enyi ndini, amangbe isi enyi gi unu a nyan a wuru ihien-mmaka ogenni. Kama, m cho ni unu kwademe, e che—ke m don gwa we ni unu k'e me; ⁴ omeni unu akwademeni, ndi Masedonia sonhen m hun a ni unu eke kwademe, ifenren e megbu enyi ime ihienni—o ri wuzi unu le enwen unu. ⁵ Ya hain o gi ri m mkpa ni m zi umune enyi ndi hu, ni we bu uzo biau d'e kunrun onu d'a kwademecharin ihien ile gbashari oiyeni hi-ogbe onu kwe nkwa a, m kebe bia; keni o hun uzo wuru oyiye unu wepuha obi unu ye, eleni we waye unu ya olu.

⁶ Ihien rin'a wu hunni: onye hun kunleni oda jenkọ d'a ghorị hun buleni oda; onye hun kun oda jenkọ d'a ghorizikwo hun bu oda. ⁷ Onye-onye ya ye ihien owule ri a obi, y'e meyele e elele; y'e yele nọke si we wa a ye e olu—makeni onye a shiapu efọ e ye ke ihien e a suo Osolobue. ⁸ Osolobue k'a saeka yesonme unu ihien ile ri mma, ye unu ya oda-oda, keni unu hun uzo e nwẹcharin ihien ile ri unu mkpa, hunzi uzo e ye oda ogen owule orun ri mma gi fuha. ⁹ Erira ke Ehuhuo-nsọ don ku e, si,

“O buoyesonme ndi-igbenye ihien
oda-oda;

o k'e mesonme ihien Chuku cho
jenrin ejen.”

¹⁰ Osolobue, hun e ye ihian mkpuru o k'a kunye le ihien-oriri o k'e ri, k'e ye unu mkpuru unu jenko d'a kun; o k'e me e sue, me e mi mkpuru oda-oda; o k'e me onu ghorị mkpuru hun wu ime ihien Chuku cho, ghorị a oda-oda. ¹¹ O k'e me onu wuru ndi-idafin uzọ ile, keni onu hun uzọ a hakenme eka. Enyi nwen k'e me e ru ndi bu oda eka. Eriira ke ihakeni k'a don weheni Osolobue ekele. ¹² Makeni, ihienni unu ri e wepuha obi unu e me siko d'e ye ndi nke Osolobue ihien ri we mkpa; kani ele ohun suo, o k'e mezikwo ndi bu oda e kelesonme Osolobue. ¹³ Unu k'e gi orun-eyemekani weheni Osolobue ogho, makeni o k'a ghosi ndi bu oda, hun k'e ri erere e, ni unu hu a gbaye ozioma Kraisti ahun unu kweri nke-esi, ni ya hain unu gi ye we le ndi ozo oda. ¹⁴ Ihien unu k'a suokenme we; we k'a gha e me ni unu ekpere make efoma Osolobue me ni unu ebe o no me unu sa eka meni we ihienni.

¹⁵ Ekele ya rini Osolobue make oyiye e hun onu ghaleni a saeka a kowa!

Isi Nke Iri

Polu A Kowa Orun A

¹ Mme wu Polu ri a riọ unu; m ri e gi nwayo, e gizi eka-alulu Kraisti, a riọ unu. Mme hun we si ni m'e welu enwen m ali omeni mme le unu nodi elee-m, elee-i, kani m ghahu ebe onu ri pu, a ganma m onu, kushime iken! ² M ri a riọ unu, anikwole n'a wuru ni, m bia, a gwapu m ndi hu ri e ro ni enyi ri e bi ke ndi-ua oku, a hun w'a ni egun ari m enya. ³ Makeni, osuon'a ni enyi bi ime uwa ri ke ihian, enyi ara lu agha ke ndi-ua don a lu. ⁴ Makeni, ihien-ogun enyi ele nke ndi-ua, kama,

ihien-ogun enyi nwonsonme iken Osolobue, hun we gi e tikposonme ebe zeni le ihien ndi hu zeni. Enyi e tikposonme atumiroro-le-ndondo ⁵ le ihien owule hun e bushi enwen e elu, hun e gbondon ihian amarile Osolobue; enyi a nwundon iroro owule, me e n'o humeni Kraisti isi. ⁶ Enyi a kwademeguo hun enyi e gi gi afunfun son nnupu-isi owule, omeni onu nwen e humecharin isi uzo ile.

⁷ E leban ni ihien enya ohunma: omeni o wegua unu enya ohunma-ohunma ni unu wu nke Kraisti, nyanhankwo ni ni ke unu don wu nke Kraisti ke enyi donzi wu nke e. ⁸ Di-nwonna-enyi ye m iken m'e gi du unu: iken m'e gi me unu sue ime okukwe—ele idotu unu. Ya wu, o suo n'a ni m'e gikezi iken ahun a nyan isi, ohun emeko m ifenren. ⁹ Achoni m n'o no ke si m gi ehuhuo-ozim e ron unu egun. ¹⁰ Makeni, o nwe ndi a si, "Ehuhuo-ozim e ze eze, ele we ihien we gi e gu egu; kani, i hun ya le enwen e k'o no, o zeni, o nwondeni ihien we gi oku-onu a e me!" ¹¹ Ndi ri e ku enina we marinkwo ni ihien ohu hu enyi ri e de ebe enyi ri uzo ozo ke enyi jenkod'e me enyi bia ebegu.

¹² Enyi esonkokwo ndi ahun ri a ja enwen we mma ma-usue. Makeni, we gha e gi ibe we e lele enwen we, e gi ibe we a ma enwen we, we ri a ghosi ni aghotani we. ¹³ Kani o me nke enyi le enwen enyi, enyi a nyanghafeko isi oken. Ihien ri ogbo Osolobue keye enyi run ime orun izi-ozima suo ke enyi k'e gi nyan isi. Ogbo hu rude ebe unu ri. ¹⁴ Ya wu ni enyi arunghafeni ogbo enyi ogen enyi gi weheni unu ozima—hun o me ni enyi wu ndi ibuzo bia ebegu teni unu ri d'e zi unu ya wu ozima Kraisti. ¹⁵ Enyi ari a nyanghafa isi oken—ya wu enyi

ara gi ọrụn ndi ọzọ rụn a nyan isi. Olil'anya ẹnyi wu ni okukwe unu k'a gha e suewaye, keni ẹnyi hun ọzọ e nwonwaye oghere ẹnyi e gi rụn ọrụn ime igunrun unu; ¹⁶ ẹnyi a hun ọzọ gha ali unu si ali ndi ọzọ d'e zi ozioma. Ogen hu, oku igi ọrụn ndi ọzọ a nyan isi arikozi.

¹⁷ Ehuhuo-nsọ si,
“Onye k'a nyan isi

ya gi ihien Di-nwonni-ẹnyi me nyan isi.”

¹⁸ Make ni, ele onye hun a ja enwen e mma ke we e ku oku e ohunma, kan onye hun Osolobue ja mma.

Isi Nke Mmanai

Polu Le Ndi-ozu pu-ichen Ntu

¹ K'o ri m unu e din m ni m zuzu ekere. Dodo ni, nwon ni ni m ndidi! ² Ọnya ri a fu m make onodi unu, udi ẹnya-ufu hun gha eka Osolobue bia. Unu wu nwa-agbo m kwe okenye ohu suọ nkwa ni m jenkọ d'a luye e ya. Okenye ahun wu Kraisti. M kwe nkwa ni m jenkọ d'e we onu ye e ebe onu keleni marin okenye. ³ Kan, egun ri a tu m ni we jenkọ d'e dufie onu, nọke ke Ekwensu don gi ero dufie Ivu, me unu e fezile Kraisti ofufe ezioku le hun rulen: ⁴ make ni unu a nabanhankazi onye owule bia d'e zime unu ozi Jesu ọzọ hun wulen hun ẹnyi zi unu ozi e; ara fu unu ọrụn inabanhan mmon ọzọ mobu ozioma ọzọ hun wulen hun unu gha eka ẹnyi nwehen. ⁵ Kan, o weni m ẹnya n'o nwegho ke ndini unu a kpo “oke ndi-ozu pu-ichen” don ka m. ⁶ Ikenkwọ a ma m ku oku; kan, a maringho m ihien —ẹnyi e giguo ọzọ ile ghosi unu onwan ime onodi ile.

⁷ M mę njọ m gi welụa enwęn m alı zi ụnụ ozioma Osolobue ofe, keni Osolobue gi e busi ụnụ elu?
⁸ Ogęn m gi ri a runni ụnụ orun, ụka ndi-ozo ye m ihien, a narin m we bu ele we ke m gi e a runni, o no ke si m ri e zunarın we ihien we—keni m hun uzọ runni ụnụ. ⁹ Ke m ri ime igunrun ụnụ, ogęn ihien gi ri a fu m orun, ebuyeni m onye owule ibu, make ni umune ęnyi gha Masedonia bia wehęni m ihien ile ri m mkpa. Ya wu, mme si n'a wuko m ibu ebe ụnụ ri. Eri ra k'o jenkọ d'a risonme: awuko ni m ụnụ ibu. Kaka! ¹⁰ Make ni ezioku Kraisti ri ime m, m ri e ku e n'o nwonni ihien jenkọ d'a saeka napu m ihien ni m gi a nyan isi ime Azuun Akaya ile! ¹¹ Ki haın nwan? Make ni enwe m ihien-osusuọ ụnụ? Mba. Osolobue a maringho ni m nwe ihien-osusuọ ụnụ!

¹² M jenkọ d'e mesonme ihien ni m ri e me, amamgbe ndi hu ri a nyan isi ni we wu ndi-ozu pu-ichen a hun oghere hu we choko hun ihian e gi si ni ęnyi le we wu ohu. ¹³ Ndinị ele ndi-ozu pu-ichen nke-esi; ndi-ndufie ke we wu. We ri a za ndi-ozu pu-ichen Kraisti e gi e e kpume ihun. ¹⁴ Onwan ele ihien a tu ęnya! Make ni, ke Ekwensu le enwen e e mede ke si o wu mmon-ozu ukpe! ¹⁵ Ya wu ni ele ihien a tu ęnya omeni ndi-orun a hu e me ke si we wu ndi a run ihien ri mma. We jenkọ d'a narin ugwo-orun furu ihien we ri e me.

Afunfun Polu Ta Make ni O Wu Onye-ozu Pu-ichen

¹⁶ Ni m kuzi e, erokwole ni ni m wu onye-nzuzu! Kani, omeni iya ke ụnụ ri e ro, weri ni m nwan rike onye-nzuzu, keni m hun uzọ nyan isi ekerę.

¹⁷ Ele Di-nwonni-ęnyi si m ku ihien ni m cho ni m gi nyan isi—kani, m ri e kuhu rike onye-nzuzu.

¹⁸ Ebe o mę ni ndi bu oda hu e gi ihien ihian-mmaka a nyan isi, mme nwen jenko d'e mezikwo erira. ¹⁹ Unu le enwen unu a marinka ihien! Iye ndi-nzuzu efe, a nabanhan we, a suoka unu. ²⁰ Unu a nabanhanka onye owule hun e me unu ke igbon, mobu hun e rigbu unu mobu hun a tunarin unu ihien onu mobu hun e me ke si o rika mkpa mobu hun a made unu ora! ²¹ Osuon'a ni ifenren m ro, ni m ku e: obi enyi ezeruni erira.

Kani, ihien owule we nwe egun ni we gi nyan isi, egun k'a nizikwo m gi ihien ahun nyan isi; (m ri e ku ke onye nzuzu.) ²² We wu ndi Hibru? Ya ke mme nwen wuzi. We wu ndi Izrelu? Ya ke mme nwen wuzi. We wu umu Ebrahim? Ya ke mme nwen wuzi. ²³ We wu ndi-orun Kraisti? M ri e ku rike onye isi zuleni oke: mme ka we onye-orun Kraisti a wu, mme ka orun a run, mme ka ngan e jen, mme ke we ka mkpinsin a fian—mgbe ole-le-ole ke we fianpu m mkpinsin. Onwun a kposonmezi m ihun. ²⁴ Mgbe isen ke ndi Ju fianpu m ube-mkpinsin ohu-aria-ogunna we ahun.

²⁵ Mgbe eto ke ndi Rom fianfu m mkpinsin. A magwo we m omuma mgbe ohu. Mgbe eto ke ugbo-mirin m ri ime e tikpogu. A nogho m elu mirin uhuhin ohu gbe-gbe-gbe—uhihin le efinnai, ibe osisi suo ke m hun kwondon eka elu mirin ahun. ²⁶ M'a risonme uzọ-ijen; eje-ihien a kposonme m ihun elu-iyi; ohin a kposonme m ihun; eje-ihien ndi ali m k'e me m a kposonme m ihun; eje-ihien ndi ali ndi ozọ k'e me m a kposonme m ihun; eje-ihien a kposonme m ihun ime obodo—ihian jun, a kposonmezi m ihun ime atu—ihian rileni; eje-ihien a kposonme m ihun elu-ohimin; nsongbu ndi kpo

enwẹn wẹ ndị kwerini bu ekwerini wẹ a kposonme m ihun. ²⁷ M'a rungbu enwẹn m; m'a ta afunfun; m'e chusonme-uran; m'e busonme egun ihien-oriri le ihien-orira; ihien-oriri a kosonme m; m'a risonme onodi oyi gi a tu m; ekwa a kosonme m. ²⁸ Wezukade ihien ndi ozo ile, uhuhin ile ke m gi e bu ibu iroro orinimma uka ile. ²⁹ Onye ke ndun guu, hun ndun ogugu a guleni mme nwen ndun? Onye ke we me dan ime okukwe, o noleni fukemem?

³⁰ Omeni m k'a nyanriri isi, ihien ndi hun a ghosi ni ndun ari m ke m'e gi nyan isi. ³¹ Osolobue a maringho ni ele m ri a tu ntu—Osolobue, hun wu Osolobue le Nedi Di-nwonna-enyi wu Jesu—ojjamma ya rin'a jenin ejen! ³² Ime obodo Damas'kosi, Govanokipuru eze Aretasi buto ndi-nche onugbon obodo hu, keni o nwundon m, ³³ kanu we no gi ukpali gha oghere ri mgbon hu wetu m, m no wanahin a.

Isi Nke Mmẹbuo

Ihien Osolobue Ghosisonme Polu

¹ O ri mkpa ni m nyansonme isini—osun'a ni o nweni erere o ban. Ni m ku nwan oku ohun le ihien ndi hun Di-nwonna-enyi ghosi m.

² A maringho m onye nke Kraisti ohu, hun we weri shi elu-igwee nke eto ahua mmenoghanike ime-ehu k'o me k'o gha ime ehupụ, a marin m; Osolobue ya marin. ³ A maringhozi m ni we weri onyeni—amarin m k'o ri ime ehura o gha ime ehupụ, Osolobue ya marin— ⁴ we shi ali Izu-iken wu Paradaisi, o no nu ihien ndi we ghaleni a gwa ihian, ihien ndi we ghaleni a ni ihian e ku.

⁵ M k'e gi nwan onye nọ ẹnina nyan isi, egikọ m mmẹ lẹ enwẹn m nyan isi; ihien ndi hun a ghoṣi ni ndun ari m sọọ kẹ m'e gi nyan isi. ⁶ Kani, o mede ni m cho ni m nyan isi, ele ya wu ni m wu onye-nzuzu, make ni ihien m k'e ku wu ezioku. Kani, emeko m'a, make ihian gha e ro ni m wu ihien owule kari ihien we hun m me le hun we nu m ku— ⁷ make ni ihien ndini m hun a puka ichen. Kani, igi gbondon m amangbe m'e gi ifiri ihien ndini pu-ichen m hun pacheme, Osolobue nọ bu nsongbu che m ehụ—rike ebe we nọ kpọ ogun ye ihian ehụ. Nsongbuni wu onye-ozu Ekwensu. We we e che m ehụ n'ọ hun uzo a lu m, amangbe m'a pacheme. ⁸ Mgbe eto kẹ m riọ Di-nwonn-enyi banyeni ihien ni, n'ọ me e hapu m. ⁹ Kani Di-nwonn-enyi nọ si m, “Mba; eyemeka m e higuọ i, make ni ebe ndun noleni ri ihian ke iken m nọ a puhachanrin ifon.” Ya wu, m gi nwan ighogho a nyan isi ni ndun ari m, keni iken Kraisti hun uzo risonme ime m. ¹⁰ Ya wu, make ufiri Kraisti, o hugho m mma ni ndun ari m; ni w'a kpari m, ni m'a ta afunfun, ni we e kpokpo m le ni odakin ri ichen-ichen a biani m. Make ni, ogen owule ndun gileni ri m ya ke m gi e kenren.

Orinimma Ndi Kọrẹnti Ri Polu Obi

¹¹ E meguo m ke onye-nzuzu! Unu hain m gi me e! Unu te furu hun e kuni m ohunma—make ni o nwonn ke ndini unu ri a kpọ oken ndi-ozu pu-ichen don ka m mkpa a ri, osuon'a ni o nwonn ihien m wu.

¹² Ogen m gi ri ime igunrun onu, m tu-udon runchanrin ihien bu oda we gi a marin ezigbo onye-ozu pu-ichen: ke ihien-ahima ke ihien a tu enya ke

ihien a ghoji iken Osolobue. ¹³ Ki we me ni uka ndi-ozọ hun we meleni ni onu, wezuka ni ebuyeni m unu ibu iye m ihien m'e gi bi? Dodo ni, gbaghari ni m njo m me hun m gileni buye unu ibuni!

¹⁴ Lee n'e, a kwademeguọ m nwan ni m lala d'a hun unu nke mgbe eto. M bia, anakọ m unu ihien owule, emeko m ibu. Makeni, unu ke m cho, ele ihien unu. Eghee, makeni ele umu a kpatoni ndi mu ni we ihien, ndi muni we nwe a kpatoni we. ¹⁵ O k'a suogbude m igi ihien ile m nwon yeni unu aka—gizide ndun m. O me nwan ni m ri a nwewaye ihien-osusuo unu, unu k'e belua nwan ihien-osusuo unu nwe ebe m ri?

¹⁶ Unu nwe iken si, “Osuon'a ni ezie ro ni y'e buyeni enyi ibu, y'e megho enyi ero, dufie enyi, teri enyi.” ¹⁷ Nani ke m don me e? M gide nwan ndi m ziheni unu tunarin onu ihien onu ra? ¹⁸ Mmẹ riọ Taitosi n'o bia d'a hun unu; m no zizikwo nwene-enyi hun-ebọ hu chen'e. Taitosi a tunarinni unu ihien unu. Ra o tunarinde unu atunarin? Ele agungun ohu hu ke enyi gun? Ele usonron ohu ke enyi gi run?

¹⁹ Unu ride e ro ni enyi gi ihienni ile enyi ri e ku e kinrin onu enyi ebe unu ri ra? Mba. Enyi ri e ku noke ndi ri ime Kraisti; enyi ri e ku rike ndi ri id'enya Osolobue. Ndi ri m obi, enyi ri e me ihien ile enyi ri e me ni enyi gi e yeni unu aka sue ime okukwe.

²⁰ Egun ri a tu m ni ikenkwo, m bia, ahunko m unu ke m don cho, unu nwen ahunko m ke unu don cho; egun ri a tu m ni, ikenkwo, ikpe le enya-ufu le eje-olulu jenkọ d'a ri; ni ndi hu ime unu k'a choma nke-we, nke-we; ni nkuto, oku-azuun, mpache le

isusu jęnkọ d'a rị. ²¹ Egun rị a tu m, ni, ikęnkwo Osolobue m e welua m ali ebe unu rị—ogę m'e gi bįzi, ikęnkwo a kwanma m ekwan make ndi bu oda me njo mbu, hun keleni gbehuto obi we banyeni ihien ndi hu ru unyin we me le ughere le ihien-ifenren ile we mesonme.

Isi Nke Mmętu

Mkpinsin-eka Le Ekele Ikpazuun

¹ Onwan k'e me e mgbe eto m lala d'a hun unu: “Osheri madu ebuo mobu eto ke we siko d'e gi gi ikpe owule don.” ² A gbaguo m ndi hu me njo mbu le ndi ozo hoduni mkpinsin-eka—ke m bia hun me e mgbe ebuo; m rizi nwan a gba we ya hunni m rileni ebegu, ni, m bia, egiko m eka aluluu son onye owule—³ ebe o me ni unu cho ni m ghosi onu ni Kraisti ri ime m e ku nke-esi. Kraisti a ra gi eka-aluluu e son onu—mba! O gi icken e me ihien ime onu. ⁴ Osuon'a ni we kpogbu e elu-obe noke onye nwonleni icken, o huzi nwan ndun ghahani icken Osolobue. Ime e, enyi nwen nke rizikwo ke ndi nwonleni icken; kani, o me nke eka enyi k'e gi son unu, enyi k'e son e gi icken Osolobue bi, gi icken Osolobue hu son unu.

⁵ Lekpo ni enwen unu, ni unu marin ke unu hu ime okukwe. Lele ni enwen unu. Unu amarin ni Jizos' Kraisti ri ime unu? Unu a maringho nu—sunkpan ni unu a danguo nlele hu.

⁶ M nwon olil'enya ni unu k'a hun a ni enyi nwen adanni nlele hu. ⁷ Kani, enyi hu e me ekpere a rio Osolobue, amamgbe unu e me ihien owule rileni mma—ele keni we si ni enyi paha ohunma, ni enyi a

runka ọrụn ime igunrun ụnụ, kama, keni ọnụ mehu ihien ri mma—osun'a ni enyi no ke ndi dan nlele hu. ⁸ Makeni, enyi a saeka me ihien owule e gbondon ezioku, kama, ihien a kwadon ezioku suo ke enyi e me.

⁹ Enyi a ghoghọ aghoghọ omeni enyi ezeni bu ọnụ e zegho. Ekpere enyi wu ni unu zuchanrin oke.

¹⁰ Ya hain m gi deni unu ihien ndini ogegni m keleni bia ebahun unu ri, amangbe m'a bia, e gi miken hu Di-nwonna-enyi ye m gi du unu gi aka-iken son unu—iken hun o ye m gi me unu sue, ele hun m'e gi tikpo unu.

¹¹ Nke ikpazuun, umune m, ghoghoma ni; [nodi ni ohunma!] Bihuto ni aka; a gba ni ibe unu ume; e nwon ni obi ohu; e gi ni udon e bi. Unu me enina, Osolobue hun udon le ihien-osusuo gha aka a bia k'a noyeni onu.

¹² Dide ni ibe onu odide ri nsọ. Ndi nke Osolobue ile e zi ekele unu.

¹³ Efo ma Di-nwonna-enyi wu Jesu Kristi le ihien-osusuo Osolobue le mmeko ri ime Mmon-nsọ ya noyeni onu ile.

**Elu Ọhụn: Ekwọ-Nsọ (Azụn Ọhụn rịn'a)
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

xxx

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 21 Feb 2024 from source files dated 29 Jan 2022

31b0248e-272a-5dee-8226-bcc00c54d9b1